

Na osnovu člana 38. stav 2. Zakona o lovstvu ("Službene novine Federacije BiH", br. 4/06, 8/10 i 81/14), federalni ministar poljoprivrede, vodoprivrede i šumarstva donosi

## **PRAVILNIK O USLOVIMA GOSPODARENJA LOVIŠTEM**

### **Član 1.**

Ovim Pravilnikom propisuju se uslovi za gospodarenje lovištem i unapređenje lovišta.

### **Član 2.**

Gospodarenje lovištem, u smislu ovog Pravilnika, obuhvata:

- a) izrada i provođenje lovnoprivredne osnove i godišnjih planova gospodarenja lovištem;
- b) određivanje namjene površina lovišta, površina rezervata i dinamike zaštite staništa i očuvanja divljači, površina za izgradnju stalnih i privremenih prihvatilišta za fazanske piliće, površina za ograđivanje za intenzivni uzgoj krupne divljači i sl.;
- c) stalno praćenje brojnosti i "stanja" fondova divljači u lovištu i vođenje lovne evidencije i statistike;
- d) praćenje zdravstvenog stanja divljači i saradnja sa veterinarskom službom (dostava uzoraka i obaveštavanje u vezi nalaza i sl.), poduzimanje preventivnih i represivnih mjera i dr.;
- e) planiranje, organizacija, realizacija i kontrola obilježivanja granica lovišta, granica rezervata, terena za obuku lovačkih pasa, komercijalnih dijelova lovišta, postavljenje, održavanje i zamjena graničnih ploča;
- f) planiranje, organizacija, realizacija i kontrola odstrjela divljači (lova divljači), ocjenjivanje trofeja divljači, izdavanje trofejnih listova i vođenje evidencije;
- g) ostale mjere i aktivnosti koje zavise od specifičnih prilika u lovištu, odredaba Zakona o lovstvu, akata korisnika lovišta i stanja organizovanosti korisnika lovišta.

### **Član 3.**

Pravna osoba kojoj je u skladu sa Zakonom o lovstvu dodijeljeno lovište na korištenje (u daljnjem tekstu: korisnik lovišta) obavezna je ispunjavati sljedeće uslove:

- a) da ima urednu registraciju za obavljanje poslova iz oblasti lovstva;
- b) da u roku od šest mjeseci od dana preuzimanja lovišta na gospodarenje obilježi granice lovišta;
- c) da u roku od jedne godine od dana preuzimanja lovišta donese lovnoprivrednu osnovu za lovište kojim gospodari;
- d) da lovištem gospodari u skladu sa važećom lovnoprivrednom osnovom i odobrenim godišnjim planom gospodarenja lovištem;
- e) da osnuje i vodi katastar lovišta;
- f) da obezbijedi finansijska sredstva za provođenje lovnoprivredne osnove;

- g) da obezbijedi sredstva za naknadu štete koju divljač može učiniti imovini ili ljudima na zemljištu i vodi na kojima se nalazi lovište (bankovnu garanciju ili izjavu o zasnivanju založnog prava na nekretnini u njenom vlasništvu u iznosu od 10.000 KM;
- h) da ima organizovanu službu za provođenje stručnih poslova u lovištu;
- i) da ima organizovanu profesionalnu lovučuvarsku službu;
- j) da osigura provođenje preventivnih dijagnostičkih, kurativnih i higijensko-zdravstvenih mjera u lovištima i ostalim prostorima gdje se divljač uzgaja ili obitava radi zdravstvene zaštite divljači;
- k) da sredstva ostvarena u gospodarenju lovištem koristi namjenski i u skladu sa članom 51. Zakonu o lovstvu;
- l) da prati realizaciju lovnoprivredne osnove i godišnjih planova gospodarenja lovištem prema propisanim evidencijama;
- m) da mjerama korištenja lovišta održava normalan kapacitet pojedinih vrsta divljači i time utiče na obim šteta kod drugih privrednih grana na području lovišta;

#### **Član 4.**

Korisnik lovišta je obavezan da sredstva koja ostvari u gazdovanju lovištem koristi prvenstveno za realizaciju lovno-privredne osnove i unaprjeđivanje lovišta.

Unaprjeđivanjem lovišta smatra se :

- a) čuvanje i zaštita divljači i lovišta;
- b) održavanje i poboljšanje životnih uslova za divljač u lovištu;
- c) izgradnja lovnouzgojnih i lovnotehničkih objekata;
- d) izgradnja prihvatilišta za fazanske piliće;
- e) izgradnja solišta i iznošenje animalne soli u lovištu;
- f) obezbjeđenje hrane za prihranu i prehranu divljači u lovištu;
- g) obezbjeđenje vode u lovištu;
- h) podizanje remiza, polja za divljač, obrada njiva i sl.;
- i) dostizanje i održavanje odgovarajuće spolne i starosne strukture pojedinih vrsta divljači u okviru utvrđenog kapaciteta lovišta;
- j) unošenje novih vrsta divljači u lovište;
- k) preduzimanje mjera za smanjenje šteta koje divljač može učiniti imovini ili ljudima na zemljištu i vodi na kojima se nalazi lovište;
- l) smanjenje broja predatora.

#### **Član 5.**

- (1) Korisnik lovišta dužan je osigurati da stručne poslove u lovištu, odnosno provođenje poslova predviđenih lovnoprivrednom osnovom, obavlja osoba sa završenim VII stepenom obrazovanja, šumarskog smjera, koja je tokom svog školovanja izučavala predmet lovstvo.

- (2) Poslove iz stava 1. ovog člana obavlja jedna ili više osoba koje čine stručnu službu korisnika lovišta (u daljnjem tekstu: stručna služba).

### **Član 6.**

Korisnik lovišta svojim općim aktom određuje potreban broj osoba koje će činiti stručnu službu, a ovisno o: površini lovišta, vrsti i brojnom stanju divljači koja se uzgaja u lovištu, mogućem kapacitetu lovišta propisanom lovnoprivrednom osnovom, vrsti i broju divljači planirane za lov, vrsti i konfiguraciji lovišta te intenzitetu uzgoja i ispuštanja divljači u lovištu.

### **Član 7.**

Stručna služba organizuje, obavlja i nadzire sve stručne radnje i poslove u lovištu koji se odnose na:

- a) uzgoj i zaštitu divljači i ostalih životinjskih vrsta;
- b) staništa divljači;
- c) lovnotehničke i lovnoprivredne objekte;
- d) lovačke pse;
- e) lovačko oružje i municiju;
- f) lovnu etiku;
- g) lov divljači;
- h) štete od divljači i na divljači;
- i) prihrane i prehrane, zdravstvenog stanja i kondicije divljači;
- j) analizu stanja u lovištu;
- k) ostale stručne poslove u lovištu u skladu s odredbama Zakona o lovstvu i podzakonskih propisa donesenih na osnovu njega, lovnoprivrednom osnovom i ugovora s nadležnim organom.

### **Član 8.**

- (1) U cilju provođenja lovnoprivredne osnove stručna služba obavlja poslove nadziranja i praćenja stanja u lovištu koji se naročito odnose na:
- a) brojno stanje divljači te polnu, starosnu i trofejnu strukturu divljači i njihovih populacija;
  - b) dnevnu i sezonsku migraciju divljači;
  - c) zdravstveno stanje i kondiciju divljači;
  - d) uslove za razmnožavanje divljači i vođenje mladunčadi, broj rasplodnih ženki i njihovih mladunčadi te ostvaren prirast po vrstama divljači;
  - e) brojno stanje predatora i ostalih životinjskih vrsta;
  - f) prihranu i prehranu divljači;
  - g) stanje lovnotehničkih i lovnoprivrednih objekata;
  - h) način lova divljači te upotrebu lovačkih pasa, lovačkog oružja i naboja, lov pticama grabljivicama;
  - i) obilježavanje granica lovišta;
  - j) rad lovočuvara na stručnim poslovima, za koje mu daje upute;
  - k) provođenje naučno-istraživačkih radova ako ih ima u lovištu;
- (2) Stručna služba organizuje sve potrebne radove na provođenju lovnoprivredne osnove koji se naročito odnose na:

- a) opažanje, praćenje i brojenje krupne divljači te opažanje, praćenje i brojenje sitne divljači;
  - b) obavljanje lova u skladu s lovno-gospodarskom osnovom i brojnim stanjem divljači;
  - c) održavanje broja divljači unutar populacije u broju predviđenom lovno-gospodarskom osnovom;
  - d) ocjenjivanje trofeja divljači;
  - e) provođenje preventivnih mjera zaštite divljači pri obavljanju poljoprivrednih i drugih radova u lovištu;
  - f) provođenje preventivnih higijensko-zdravstvenih mjera u lovištu radi zdravstvene zaštite divljači i drugih životinjskih vrsta;
  - g) na zahtjev korisnika lovišta organizuje lovni turizam;
- (3) Stručna služba izrađuje i obavlja sve potrebne i propisane analize, evidencije, korespondencije i izvještaje, i to:
- a) elaborat brojenja i prebrojavanja divljači;
  - b) štete od divljači i štete na divljači;
  - c) plan lova divljači;
  - d) plan prihrane i prehrane divljači;
  - e) trofeje divljači i trofejne listove;
  - f) obavljanje lova divljači te prihrane i prehrane divljači;
  - g) promet divljači i njezinih dijelova;
  - h) lovce i lovačke pse;
  - i) brojno stanje divljači, predatora i ostalih životinjskih vrsta;
  - j) promjene u lovištu i na staništu divljači;
  - k) katastar lovišta;
  - l) statistički izvještaji;
  - m) ostali izvještaji za korisnika lovišta i nadležna tijela državne uprave;
- (4) Stručna služba u skladu s lovnoprivrednom osnovom utvrđuje:
- a) godišnji plan lova po vrstama divljači, a kod krupne divljači po polu, starosnoj i trofejnoj strukturi u skladu sa stvarnim stanjem divljači neposredno prije lova;
  - b) vrijeme, mjesto i količine hrane, soli i vode za prihranu divljači;
  - c) dinamiku izvršenja potrebnih radova u lovištu;
- (5) Stručna služba nadzire provođenje lovnoprivredne osnove, te daje prijedlog za provođenje postupka revizije lovnoprivredne osnove.

## **Član 9.**

Dužnost korisnika lovišta je da sve sudionike u lovu upozna sa pravilima sigurnosti u lovu.

Pravila sigurnosti u lovu su sljedeća:

- a) divljač je dozvoljeno loviti lovačkim oružjem i lovačkom municijom;
- b) oružjem se mora rukovati oprezno i odgovorno;
- c) prilikom odlaska do mjesta lova, prelaska na drugo mjesto, kratkog prestanka lova, boravka u zatvorenim prostorijama, puške se moraju isprazniti odnosno prelomiti;
- d) puška se puni okrenutih leđa sudionicima lova, tako da se cijev drži koso, usmjerena cijev ima na dolje ili gore;
- e) cijev puške se nikada ne smije uperiti prema drugom lovcu;

- f) nije dozvoljeno pucati na nisko leteću divljač ili na divljač koja se kreće u pravcu drugih lovaca i kada se oni time ugrožavaju;
- g) nije dozvoljeno pucati na vodu, led ili smrznuto zemljište u pravcu drugih lovaca;
- h) prije početka lova svakog lovca upoznati sa mjestima susjednih lovaca i upozoriti ih na zabranu pucanja u određenim pravcima
- i) u grupnom lovu, divljač se ne smije pratiti sa uperenom puškom, sve dok se ne prođe crta postavljenih lovaca;
- j) ubrzač okidanja ("šneler") u grupnom lovu se ne smije koristiti;
- k) nije dozvoljeno divljač osmatrati pomoću optičkog nišana na pušci;
- l) prilikom nošenja oružja ruka se ne smije držati na ustima cijevi ili na okidaču (obarači);
- m) poslije pada puške na zemlju ili u snijeg, odnosno podizanja puške, moraju se pregledati usta cijevi radi otklanjanja eventualnih začepjenja;
- n) mjesto na koje je lovac raspoređen ne smije se napuštati u vrijeme lova bez odobrenja stručnog pratioca ili vođe grupe lovaca do završetka (prigona ili pogona) lova;
- o) prilikom sudjelovanja u kružnom lovu i u prigonu, puška se mora držati u položaju koso dolje ili koso gore;
- p) sudionike u lovu, prekršiocyte pravila iz stava 1. i 2. ovog člana, stručni pratilac ili vođa grupe lovaca će isključiti iz lova.

#### **Član 10.**

Nije dozvoljen lov divljači:

- a) u vrijeme kada je vidljivost znatno smanjena (vidljivost manja od 150 m), lošeg vremena (uslijed magle, jake kiše, snijega, jakog vjetera i sl.), hemijskog, biološkog i radioaktivnog zagađenja, ratnog djelovanja na površinama gdje je ustanovljeno lovište;
- b) noću, dva sata prije izlaska i dva sata poslije zalaska sunca, osim divljih svinja, medvjeda i vuka u noći sa mjesecom, dočekom sa čeke.
- c) zabranjeno je loviti divljač, osim u svrhu spašavanja, u sljedećim uvjetima:
- d) kada je ugrožena poplavom;
- e) kada je ugrožena požarom;
- f) kada je ugrožena visokim snijegom (visina snijega iznad 40 cm);
- g) kada je ugrožena dugotrajnim sušnim razdobljem
- h) (razdoblje duže od 60 dana bez kiše).
- i) zabranjeno je obavljanje lova na pojedine vrste divljači kada lov može ugroziti zdravlje ljudi, stoke, kao i druge životinjske vrste.

#### **Član 11.**

Lovostajem zaštićena divljač i divljač izvan režima zaštite može se odstrijeliti samo lovačkim oružjem i lovačkom municijom odgovarajućeg punjenja u skladu sa odredbama Zakona o lovstvu.

#### **Član 12.**

Za svu učinjenu štetu lovaca u lovištu nastalu prilikom lova, odgovoran je korisnik lovišta. Korisnik lovišta mora nadoknaditi štetu vlasnicima zemljišta, voda i šuma na

kojem je šteta nastala, a ima pravo refundiranja isplaćenog iznosa od lovca koji je štetu prčinio.

### **Član 13.**

Korisnici lovišta su obavezni da, na osnovu ovog Pravilnika, usklade svoje poslovanje sa specifičnim prilikama u lovištima kojim gospodare, u roku od šest mjeseci od dana stupanja na snagu ovoga Pravilnika.

### **Član 14.**

Danom stupanja na snagu ovog pravilnika prestaju važiti Pravilnik o uslovima gospodarenja lovištima („Službene novine Federacije BiH“, broj 63/06) i Pravilnik o stručnoj službi za provođenje lovno-gospodarske osnove („Službene novine Federacije BiH“, broj 63/06).

### **Član 15.**

Ovaj pravilnik stupa na snagu narednog dana od dana objave u „Službenim novinama Federacije BiH“.